

10 JUL 2003

Multaqa-Perasmian/I (Bergambar)

MULTAQA ULAMA SEDUNIA BERMULA

PUTRAJAYA, 10 Julai (Bernama) -- Multaqa Ulama Sedunia bermula di sini hari ini dengan membincangkan isu-isu penting yang membabitkan masa depan umat Islam.

Multaqa tiga hari yang dirasmikan oleh Perdana Menteri Datuk Seri Dr Mahathir Mohamad itu dianggap tepat pada masanya berdasarkan kepada keperluan yang mendesak bagi umat Islam untuk berhadapan dengan cabaran globalisasi dan membetulkan banyak salah tanggapan mengenai Islam.

Multaqa pertama itu yang berlangsung di Hotel Marriott Putrajaya bertujuan memanfaatkan cara berfikir global demi kemajuan umat Islam.

Persidangan itu diilhamkan oleh Dr Mahathir yang mahukan program khusus untuk mendidik umat Islam mengenai maksud sebenar Islam supaya mereka tidak terkeliru oleh pandangan-pandangan pihak yang tidak bertanggungjawab.

Multaqa itu bertujuan mendapatkan cadangan daripada para cendekiawan Islam supaya umat Islam dapat menjadi pemangkin ke arah mencapai kejayaan sendiri.

Persidangan hari ini yang dijalankan dalam Bahasa Melayu, Inggeris dan Arab dimulakan dengan bacaan Al-Quran oleh Johan Qari Kanak-kanak Peringkat Kebangsaan 2003, Mohamed Anas Razali, 10, dari Tapah, Perak.

Majlis perasmian disiarkan secara langsung oleh RTM.

Multaqa yang bertemakan "Islam Di Era Globalisasi", dihadiri kira-kira 900 cerdekiawan Islam dari 34 buah negara. Sebanyak 22 kertas kerja yang meliputi bidang politik, sosial, ekonomi dan pembangunan akan dibincangkan.

Ulama terkemuka Islam Imam Besar Al-Azhar Dr Mohammad Sayyid Tantawi akan menyampaikan ucaptama pada persidangan itu.

-- BERNAMA

WNZ RT MAM LAT